

SUURAT At-TAXRIIM:

Magaca Eebe yaan ku bilaabaynaa ee Naxariis guud iyo mid gaaraba Naxariista.

- 1. Nabiyow maxaad u xarrimi wax Eebe kuu xalaaleeyey si aad u raalli geliso Haweenkaaga, Eebe waa dambi dhaafe naxariista ah.*
- 2. Eebe waa idiin caddeeyey waxa dhaartiinnu ku xalaaloobi, Eebena waa gargaarihinna, waana wax walba oge falsan.*
- 3. Ma xusuusan Waqtigii Nabigu ku qarsaday Haweenkiisa Qaarkood hadal, markaas ay ka warrantay xaalkii, Eebana uu Nabiga u daahiriyeey, markaas Nabiga uu ogeysiiyey qaarkiis (haweenaydii) qaarna uu ka dhaafay, markuu u warramay ay tiri yaa kuu sheegay xaalkan kuna yiri: waxaa ii warramay Eebaha wax walba oge ah ee yaqaana.*
- 4. Haddaad Eebe u noqotaan inkastoo qalbigiinnu iishay (Eebe wuu idiin dhaafi) haddaadse isu kaalmaysataan Nabiga (dhibkiisa) waxaa u gargaari Eebe, Jibriil iyo kuwa suuban ee Mu'miniinta ah Malaa'igta (kalana) markaas ka dib yey xoojin.*
- 5. Wuxuu Eebe u dhawyahay in Nabigu hadduu idin furo (Haweenka qaarkood) idiinkuna beddelo kuwa idinka khayr roon oo ah Muslimiin, Mu'miniin ah adeeca Eebe, Toobad keena, Eeba caabuda; Soomana, kuwa horay loo guursaday iyo kuwo aan hadda ka hor la guursanba leh.*

Sharaxda Suurrada (1)

Aayahahanu waxay ku soo degeen mar uu Nabigu (Naxariis iyo Nabadgalyo korkiisa Eebe ha yeelee) Caano ama Malab uu ka soo dhadhamiyey Guri haweenaydiis, markaas uu kuwa kale qalbigoodu wax galay, Eebana isagaa wax xalaaleeya waxna xarrima, saas daradeed yuu nabiga ugu jeediyey arrintaas, tan kale waa inaan la isku kaalmaysan dhib iyo wax yeello ee laysu kaalmaystaa wanaag iyo sama fal, Eebana waa gargaaraha Rasuulkiisa iyo Mu'miniinta. Masruuqna wuxuu yidhi: Nabiga waxaa la faray inuu dhaartii ka kafaaro guto.

- 6. Kuwa xaq rumeeyow ka dhawra Naftiina iyo ehelkiinna naar lagu shido dad iyo dhagax ay kana (shaqeeyaa) malaa'ig adag oo daran oon Eebe ku caasiyeyn wuxuu faro, falana wixii la amro.**
- 7. Kuwa Gaaloobow ha cudur daaranina maanta (Qiyaamada) waxaa laydinka abaal marin uun waxaad camal fali jirteen.**
- 8. Kuwa xaq rumeeyow u toobad keena Eebe toobad san, wuxuu Eebe u dhawyahay inuu asturo xumaantiina, idin geliyana Jannooyin ay dureerayso dhexdooda Wabiyaal, Maalinta uusan Eebe hoojinayn Nabiga iyo kuwa la jooga, nuurkooduna wuxuu socon hortooda iyo midigtooda iyagoo dhihi Eebow noo taam yeel Nuurkanaga noona dambi dhaaf adaa wax walba karee.**
- 9. Nabiyow la jihaad gaalada iyo Munaafiqiinta kuna adkow, hoygooduna waa Jahannamo meel loo ahaadana iyadaa u xune.**

Sharaxda Suurrada (2)

Dadka xaq rumeeyey waa inay ehelkooda khayrka faraan si ay uga nabad galaan naar dadka iyo dhagax lagu huriyo, Malaai'g daranna oo amarka Eebe fulisanna ay ka shaqayso, si ayna u noqonin sida kuwa xaq diidka ah ee loo dhihi ha cudur daaranina maanta, waana in Eebe toobad dhab ah loogu toobad keeno si uu wanaag iyo dambi dhaaf noogu abaal mariyo maalinta Nabiga iyo intii raacday Eebe u sama fali, illeen wax walba isagaa karee, gaalada iyo munaafiqiintana waa in lala jahaado si jidka toosan loo tusiyo. Rasuulkana (Naxariis iyo Nabadgalyo korkiisa Eebe ha yeelee) waxaa la warsaday Tawbadda Nasuuxa ah (toosan) wuxuuna yidhi: “waa in la qoomameeyo dhambiga markuu kaa dhaco, ood markaas Eebe dambi dhaaf warsato, oodan una noqonin.”

- 10. Eebe wuxuu tusaale uga dhigay kuwa gaaloobay Haweenaydii Nabiga Nuux iyo Nabi Luudh, waxaa qabay Laba Addoon oo Eebe oo suusuuban, markaasay khiyaameen Nabiyadaas waxbana ugama ayan tarin Eebe agtiis waxaana loo dhihi Labadaas haweenay la gala naarta kuwa galaya.**
- 11. Waxaa kale oo Eebe Tusaale uga dhigay kuwa rumeeyey Haweenaydii Fircoon markay tidhi Eebow Guri agtaada iiga dhis jannada dhexdeeda, igana nabad geli Fircoon iyo camalkiisa,**

igana nabad gali dadkaas daalimiinta ah.

12. Maryama bintu cimraanna xusuusta ee isdhawrtay, markaas malagu jeebka ka afuufay, rumaysayna Sharciga Eebe iyo Kutubtiisaba, kana mid noqotay kuwa Eebe adeeca.

Sharaxda Suurrada (3)

Ruuxa xumaanlaw ah wax uma tarto la nooli dad fiican hadduusan wax qaadanaynin sida haweenkii Nabi Nuux iy Nabi Luudh iyo wixii la mid ahaa, sidoo kale ruuxii wanaagsan xumaan qof kale wax ma yeesho hadduusan ka raalli ahayn sida haweenaydii Fircoon, Maryama Bintu Cimraan oo Nabi Ciise Hooyadiis ahayd xaalkeeduna la yaabuu lahaa waxayse ku tusin in Eebaha bini aadamka abuuray uu siduu rabo wax u falo saasna waa in la rumeeyo. Nabiguna wuxuu yidhi (Naxariis iyo Nabadgalyo korkiisa Eebe ha yeelee) : “Waxaa kaamil noqday Ragga wax badan, haweense waxaa ka kaamil noqday Aasiyadii Fircoon, Maryama Bintu Cimraan, iyo Khadiijo Bintu Khuweylid, Fadliga Caa’isho ee Haweenkana waa sida thariidka iyo cunada kale.” Bukhaari iyo Muslim.